

Vorrede.

ser zeit leben/ doch ettliche außgenommen die bey den alten hoch geehrt gewesen/ aber im abgang kommen/ andere aber kunst auffgangen/ vnd an jr statt gesetzt/ in den anderen so dazumal vnd jezunder bekandt/ geht es auff vnd nider/ wie zu sage ist vnder vilen anderē die Artzney/ die Astro nomey/ vnd der selbigen zugethanen handtwerck en genent mögen werden.

Archymedes hat ein grosse kugel gemacht/ die selbige in Cristall eingeschlossen/ darinnen er zeigt aller sternen/ lauff vñ bewegnuß/ das ein sonderlich wunderwerck was/ Heron Alexādrinus hat ein künstlich vhrwerck gemacht durch den tryb des wassers. Archimedes macht vil vnd mancherley kriegsrüstung on zahl. Heron macht durch bläst vñ wasser/ durch redder/ vil seltsame wunderwerck/ solche leüt findet man heutigs tags an allen ortē/ die künstliche vhrwerck/ wasserwerck/ kriegsrüstung/ gebew/ vestungen/ vund andere wunderliche werck künstlich machen können/ so wol als die alten/ jedoch etlich vil stück seind die wir den alten nach nicht nach gethan haben/ etliche so weit gebracht das sie sich der alten werckē wol vergleichen mögen.

Will zu einem Exempel nimmē des Archimes dis Cristallen kugel/ darinnē er gemacht hat mit sonderlicher kunst/ alle bewegnuß vnd lauff der Sonnē/ des mons/ der Planetē/ ja des ganzē firmaments/